

# Revni Sekirite Siplemantè (SSI) Pou Moun Ki Pa Sitwayen Ameriken



## Kimoun ki ka resevwa Revni Sekirite Siplemantè (SSI)?

Anjeneral, si w pa yon sitwayen ameriken, ou ka elijib pou resevwa SSI si:

- Ou t ap viv legalman Ozetazini depi 22 out 1996 epi ou te avèg oswa andikape nan dat sa a, oswa ou t ap resevwa SSI apati dat 22 out 1996.
- Yo te admèt ou legalman pou rezidans pèmanan anba *Immigration and Nationality Act—Lwa sou Imigrasyon ak Nasyonalite* (INA) epi ou gen yon total 40 kredi travay Ozetazini. Travay konjwen oswa paran ou ka konte tou.

Men kèk lòt moun ki pa sitwayen ameriken ki ka elijib pou pèman SSI:

- Manm aktif fòs lame Etazini;
- Endyen Ameriken ki fêt deyò Ozetazini;
- Sèten moun ki pa sitwayen ameriken epi yo admèt yo kòm imigran Ameriken-Azyatik; epi
- Patisipan Kiben ak Ayisyen yo.

Gen lòt ti gwoup moun ki pa sitwayen ameriken ki ka elijib tou pou pèman yo. Si w pa yon sitwayen ameriken epi ou vle aplike pou peman SSI, li pi bon pou kontakte nou pou wè si w elijib.

## Kredi travay

Istwa travay yon moun detèmine elijiblite li pou benefis Sekirite Sosyal, menm jan ak elijiblite pou benefis SSi pou kèk moun ki pa sitwayen ameriken. Chak ane kantite lajan salè ki nesesè pou yon kredi travay ogmante lejèman pandan nivo salè mwayen yo ap ogmante. Yon travayè kap genyen yon maksimòm kat (4) kredi pa ane. Kredit travay yo rete nan dosye Sekirite Sosyal yon moun pou toutan. Pou plis enfòmasyon, wè kopi piblikasyon *Kijan Ou Gen Kredi* (Piblikasyon Nimewo. 05-10072-HC).

## Nou bezwen prèv sitiyasyon ou

Si w aplike pou SSI, ou dwe pwouve sitiyasyon ou kòm moun ki pa sitwayen ameriken. Moun ki pa sitwayen ameriken ki te sèvi nan fòs lame Etazini ka bezwen bay prèv sèvis militè yo tou. Sa yo se egzanp prèv ou ka bezwen bay:

- Kòm prèv sitiyasyon ou kòm moun ki pa sitwayen ameriken—yon fòm regilye I-94 oswa I-551 ki sòti nan Department of Homeland Security—Depatmant Sekirite Nasyonal (DHS) oswa desizyon yon jij imigrasyon ki retire depòtasyon ou oswa ki akòde ou azil; oswa
- Kòm prèv sèvis militè—papye dechaj fòs lame Etazini (DD Fòmilè 214) ki montre dechaj onorab ki pa baze sou sitiyasyon ou kòm moun ki pa sitwayen ameriken.

Biwo lokal Sekirite Sosyal ou ka di ou ki lòt kalite prèv ou ka soumèt pou pwouve sitiyasyon ou.

## Limit setan pou kèk moun ki pa sitwayen ameriken

Si pèman SSI ou se pou setan sèlman akòz sitiyasyon espesyal ou genyen kòm moun ki pa sitwayen ameriken, n ap voye ba ou yon lèt pou endike ou kilè peryòd setan an ap fini. N ap voye ba ou yon lòt lèt pou eksplike ou dwa ou genyen pou fè apèl anvan nou sispann peman ou yo.

## Enfòmasyon sou Medicaid

Si w gen pwoteksyon Medicaid ki baze sou SSI ou, Medicaid ou ta dwe kontinye toutotan w ap resevwa SSI.

## Ou ka ranpli yon nouvo fòmilè reklamasyon

Si pèman SSI ou sispann poutèt ou pa sitwayen ameriken ki elijib, ou ka aplike ankò. Kontakte nou san pèdi tan si w vin sitwayen ameriken, si sitiyasyon imigrasyon ou vin chanje epi si w panse ou ranpli kondisyon oswa ou gen 40 kredi travay. W ap bezwen pote ban nou sètifica natiralizasyon ou oswa lòt dokiman ki montre sitiyasyon imigrasyon ou.

*Enpòtan: Si w te antre Ozetazini apre 22 out 1996, ou ka pa elijib pou SSI pandan 5 premye ane yo kòm yon rezidan pèmanan ki admèt legalman menmsi w gen 40 kredi salè ki kalifye.*

## Si w gen yon sipòtè

Lè w te antre Ozetazini, ou te ka jwenn yon moun siyen yon akò pou ba ou sipò. Akò sa a rele yon garanti sipò, epi moun ki te siyen li a rele sipòtè ou.

Nou konsidere revni ak resous sipòtè ou ak konjwen li kòm revni ak resous pa ou apati moman ou te vini Ozetazini. Biwo lokal Sekirite Sosyal ou ka ba ou plis enfòmasyon sou règleman sa yo ak sa yo vle di pou ou.

## Nimewo Sekirite Sosyal

Si w pa yon sitwayen ameriken, men si ou se yon rezidan legal ki gen pèmisyon pou travay Ozetazini, ou ka bezwen yon nimewo Sekirite Sosyal. Mande piblikasyon nou an, *Nimewo Sekirite Sosyal Pou Moun Ki Pa Sitwayen Ameriken* (Piblikasyon Nimewo 05-10096-HC).

## Kouman pou vin yon sitwayen ameriken

Ou ka jwenn plis enfòmasyon sou fason pou vin yon sitwayen ameriken depi w ekri oswa vizite yon biwo lokal DHS oswa depi w rele nan nimewo **1-800-870-3676** pou jwenn yon fòmilè aplikasyon pou natiralizasyon. (Fòmilè N-400).

## Kontakte Sekirite Sosyal

Pou plis enfòmasyon ak pou jwenn kopi piblikasyon nou yo, vizite wèbsayt nou nan [www.socialsecurity.gov](http://www.socialsecurity.gov) oswa rele nan nimewo telefòn gratis **1-800-772-1213** (pou malantandan oswa pou moun ki tande di, rele nan nimewo TTY nou, **1-800-325-0778**). Nou ka reponn kesyon espesifik epi ba ou enfòmasyon nan sèvis telefòn otomatik 24 èdtan pa jou.

**Si w bezwen yon entèprèt** pou regle afè sekirite sosyal ou, n ap fè w jwenn youn gratis. Sèvis entèprèt yo disponib ni pou lè w ap pale avèk nou nan telefòn ni pou lè w vini nan biwo Sekirite Sosyal. Rele nan nimewo telefòn gratis nou **1-800-772-1213**. Si w pale yon lang ki pa Angle, peze 1 epi rete sou liy lan pou jouk lè yon reprezantan reponn. N ap kontakte yon entèprèt pou ede w. Si afè w la pa ka regle nèt nan telefòn, n ap pran yon randevou pou ou nan yon biwo lokal Sekirite Sosyal epi n ap aranje nou pou yon entèprèt (lang) la nan moman vizit ou a.

Yon reprezantan Sekirite Sosyal ka di ou ki benefis ki ka peye epi li ka pran yon randevou, si sa nesesè, pou ranpli yon fòm reklamasyon. Nou trete tout apèl yo avèk konfidansyalite. Nou Vle asire tou ou resevwa sèvis egzat ak koutwa. Sepou rezon sa a nou genyen yon dezyèm reprezantan Sekirite Sosyal pou kontwole kèk apèl telefonik.

